

四庫全書

史部

# 欽定四庫全書

史部

唐大詔令集卷八十五至一百

詳校官編修<sub>臣</sub>范來宗

編修<sub>臣</sub>裴謙覆勘

總校官編修<sub>臣</sub>倉聖脉

校對官學正<sub>臣</sub>常循

校對官助教<sub>臣</sub>羅萬選

膳錄監生<sub>臣</sub>甯汝櫨

膳錄監生<sub>臣</sub>劉家瑛

欽定四庫全書

唐大詔令集卷八十五

宋 宋敏求 編

政事

恩宥三

大歷七年大赦

大歷八年大赦

大歷九年大赦

宥京城禁囚勅

赦京城囚徒制

元和十三年大赦

長慶四年正月一日德音

恩宥三

大歷七年大赦

門下濟於道者化醇而刑措善於理者綱舉而網疎朕涉  
道未宏燭理多昧常亦遐想太古高挹玄風保合太和

在宥天下蓋德薄而未臻也是用因時以設教使俗以  
立功務盡平恕用申哀恤又教淺而多犯也加以邊虞未  
戢井賦猶繁荒瘵之餘寇攘斯起遂令圜土嘉石之下  
積有累囚危章互簡之中困於法吏屬盛陽之候大暑  
方蒸永念狴牢何堪鬱灼所以沮傷和氣感致咎徵天  
道人事豈相遠也如聞天下諸州自春以來或憊時雨  
首種不入宿麥未登哀我矜人何恃不恐皆由朕過益  
用懼焉惕然憂嗟深自咎責所以悉減常膳別居齋宮

禱於明神冀獲嘉應仲夏之月靜事無刑以助宴陰以  
宏長養斷薄決小已過於麥秋繼長增高宜順乎天意  
可大赦天下其大歷七年五月十五日昧爽以前已發  
覺未發覺已結正未結正應天下見禁囚徒罪無輕重  
一切並宜放免所由不須類例聞奏宜令諸道節度觀  
察及州牧縣宰等於當官內所有名山靈跡各精誠致祭  
祈降甘澤冀獲豐稔永思流弊庶振風猷其巴南諸州  
仍歲水旱迫於凍餒或至流離因有剽求苟全性命懼

刑網之所及始嘯聚以相依抑有由焉蓋非獲已永言  
其弊用軫於懷如能相率來歸各安生業並無所問咸  
許自新敢以赦前事相告者以其罪罪之亡命山澤挾  
藏軍器百日不首復罪如初赦書日行五百里宣示中  
外咸使聞知

大歷八年大赦

自古帝王順時行令當此時之炎燠應南風之長羸必  
事無刑鮮網申惠叙麥秋之氣而代天理物矣朕獲奉

珪璧虔恭郊廟二紀有餘承累聖之鴻業為兆人之父  
母戰戰兢兢恐懼不濟而天地幽贊陰陽化育闡輔之  
內農祥薦臻嘉穀豐衍宿麥滋植閭閻之間倉廩皆寔  
百貨低賤寔曰小康此皆上帝報貺列祖儲祉卿士存  
誠元元盡力之效思與萬方百辟咸共樂之而未能也  
況或抵常憲纍然就拘辨對官曹置閉獄戶永惟械繫  
之慘追犯冒之由皆自王化未醇風教有闕俾人忘恥格俗  
虧禮讓陷在刑典久於狴牢當順陽助生之時積冤蔽感



傷之氣百姓有過在予一人顧譊欽恤誠切傷痛用申  
在宥之旨庶洽惟新之令其大歷八年五月二十九日  
昧爽以前天下見禁囚徒及已發覺未發覺已結正未  
結正死罪並降從流流以下並宜放免敢以赦前事相  
告者以其罪罪之亡命山澤挾藏軍器百日不首復罪  
如初夫人君承天之序則三時有成自中刑外則四海蒙  
福嗟爾庶士諒悉予懷

大歷九年大赦

朕誕膺天命以撫方夏夙夜兢惕保祐惟人懼庶獄之  
未孚俾一夫之不獲思用哀恤與之和寧頃屬夷夏多  
虞干戈是務徵賦頗重黎元不康內迫艱窮外乘師旅  
因行盜竊自陷典刑纍然圜土之下停勅視陰之命永  
念愚惑惻焉疚心而寰區之間舉類斯衆今火中惟夏  
長羸及時鬱然沉繫致傷和氣萬方有罪在予一人將  
洽至淳之化更布維新之理其大歷九年四月二十四  
日昧爽以前大辟罪以下已發覺未發覺已結正未結

正罪無輕重一切並宜放免敢以赦前事相言告者以其罪罪之其在軍將士有刀箭所傷久嬰沉疾者戮力疆場身當鋒刃各委所由量給藥物厚加優賞其陣亡將士亦仰本使隨事優恤妻子各申錫賚其百姓鰥寡孤獨不能存濟者困窮無主誠可哀傷所在府州縣長官每年以諸色官物量加贍恤令其得所亡命山澤挾藏軍器百日不首復罪如初在宥之典既周動植純嘏之錫庶延子孫凡在品彙各宜遷善宣示中外令悉朕

懷

宥京城禁囚勅

頃屬煩暑差候憊陽積旬處於高明之中猶有鬱蒸之歎而況幽閉獄戶辯對官曹甫臨秋期將正時憲重循欽恤之道載宏全宥之仁其京城內外禁囚犯流以下罪並宜釋放

赦京城囚徒制

常哀

朕以寡薄獲守丕圖恭默思道克謹天戒常恐至誠不

達景化未敷寅畏之誠寢興在慮自純陽用事霖雨愍  
旬麥雖有秋禾未長畝有阻三農之候將貽萬姓之責  
是用齊心滌思禱於上下神祇雲從自郊月未離畢膏  
澤不降憂勤益深雖水旱成災陰陽恒數而政刑失中  
或致憊伏豈簡孚有爽衷敬未誠歟嗟我矜人陷於刑  
辟當炎蒸之序在縲紲之中久積幽寃有傷和氣所以  
引成湯之六事過寔在予寬大禹之九刑誠存育物期  
於作解以救如焚其京城見禁囚徒死罪以下降從流

流以下罪一切釋放仍委中書門下即速與處分訖聞  
奏雖罪疑從輕或謂之長惡宥過無小寧失於不經庶  
空夏臺用緩秋典宣示中外令知朕意

元和十三年大赦

朕聞王者法天作則與衆守邦奉天無私居兆人上當  
恭已嚮方之際切臨深馭朽之懷憂勤靡遑今古何  
遠所重者兵革不試軌度自貞熙仁育和以至大道朕  
顧惟菲德祇奉睿圖承昊天之眷命續列聖之不緒景

食以求至理虛心而俟昌言兢兢業業常懼失墜逮今  
十有四年矣道且希於廣運意嘗在於包荒推誠則深  
感物未至頃歲蜀川浙右怙亂阻兵人神共誅剪滅相  
次姑務偃革期於措刑方簫勺以懲奸庶干羽以成化  
淮蔡寇孽稔禍挺災問罪興師蓋非獲已念征行之暴  
露軫饋給之煩勞中宵惕然載益祇厲妖兇既珍黎庶  
有康斯皆宗社垂休中外協力將勤施於下土冀昭答  
於上玄朕茲思所以與羣公卿士勵精於庶政也屬獻

歲發春授時惟敬勾萌盡達幽蟄咸蘇徽纒可矜鰥寡  
存念俾疎網之是決與慶澤而惟新可大赦天下元和  
十三年正月一日昧爽以前大辟罪以下咸赦除之

長慶四年正月一日德音

朕以寡昧獲守重器兢厲畏惕於茲五年皇天之事罔  
不修備而大典有闕舉而行之粵以元正御示正殿百  
辟咸序萬方來庭思欲推至仁以布和奉天時而施令  
況上玄貽慶列聖垂休默輔予躬以至寧復爰思士庶



同被慶靈並茲囚隸亦合流澤自今年正月一日以前  
犯死罪者並降從流流罪以下遞減一等其故殺官典  
犯賊十惡者並不在降免之列降官未經量移者與量  
移近處流人各據本年限與減一年如本限止一年放  
還朝賀之禮國之盛事肅恭班位敷讚威儀俾升慶賀  
以示宏普其應元日緣朝賀行事官三品以下賜爵一  
級四品以下加一階文武常參官六品以下及宗子應  
加陪位者并諸賀正使各賜勳一轉諸番陪位各賜有

差今兵革甫寧典常粗舉雖慙至理可謂小康唯水旱  
猶虞蒸黎重困公私蓄積頗有未豐宜令諸道觀察使  
刺史各具當處利害具有弊事可革有益於人者何術  
可以漸致富庶附驛以聞亦不用專使詣闕以省煩費  
其封畿之內百姓利病以委京兆河南尹具以條奏束  
帶立朝必資忠謹濟時利物式佇謨猷其文武百寮所  
上封事極言得失無有所隱事可施行者便委中書門  
下量加獎用朕以執契收馭時賢在典化教明至道期

致太和凡在臣寮宜知此意



唐大詔令集卷八十五

欽定四庫全書

唐大詔令集卷八十六

宋 宋敏求 編

政事

恩宥四

曲赦京畿德音

大中十三年正月赦

咸通七年大赦

咸通八年五月德音

咸通十二年五月疏理刑獄勅

光啟三年七月德音

時令

令史官條奏每月應所行事詔

歲初處分德音

開元二十四年歲初處分制

闕

恩宥四

曲赦京畿德音

王者愛人如身推已及物恤其寒燠之苦適其舒慘之  
宜俾叶太和用臻至理恭默思道憂勤在懷時屬嚴沴  
念深徽纆當霜雪之候滯囹圄之中饋餉為勞逮捕斯  
擾泣寒所迫愁嘆必多惻然疚心思有矜憐宜布在寬  
之令使無留獄之嗟應京百司及畿內諸縣見禁囚徒  
應犯死罪特降從流流以下者遞減一等如欠負官錢  
情非巨蠹責保填納不要禁繫唯故殺人者及官典犯

賊不在此限仍委京兆尹及諸司官長制下當日速決  
聞奏朕司牧黎元存誠康濟封甸殷廣京師浩穰憫觸  
法以罹辜式加恩而宥罪庶止無告寧失不經宣示中

外令知朕意

大和八年十二月

大中十三年正月赦

天將發生萬物也則必假以暄妍潤以風雨王者之在  
宥四海也期必滌其瑕穢施以渥恩固頻啟於倖門豈  
無彰於皇澤朕以菲德獲纘丕圖常慕唐堯之無為漢



文之恭儉宵旰不暇乙夜觀書萬務靡有不親一夫尤  
慮失所兢兢業業不敢荒寧十有四年至於茲矣每懼  
風俗之未厚賦役之尚繁政令之未明刑獄之多濫思  
用克濟浩無津涯上荷昊穹垂休宗社深祐下賴股肱  
翊化岳牧懋功五稼屢登四夷內附懷仁庶同於行葦  
納諫無愧於從繩俾疵癘不生飛翔遂性日月所燭庶  
為小康顧予寡昧何以臻此近者藩方之任撫理或乖  
泯禁日聞倣擾相次雖興師殄寇本於為人而殘殺戕

生良多愍然而又緣河數郡暴水成災念其蕩飄深自  
憂軫乘此三元之慶宜宏肆眚之恩可大赦天下自大  
中十三年正月一日昧爽以前大辟罪以下罪無輕重  
咸赦除之唯十惡叛逆故殺人官典犯贓不在此限

咸通七年大赦

我國家膺天明命光宅萬方二百有五十載矣梯航所  
及昭顯於夏殷文軌攸同躋逾於漢晉朕承十六聖之  
業居億兆人之上猥惟眇身祗荷丕構遠奉貞觀開元

之至理近宗憲祖宣考之宏規常慕雖休勿休豈敢自  
暇自逸然而仁不遂於百姓德不叅於二儀莫致感通  
更延災沴近者兵革未弭虫蝗相仍方懷徵發之勞又  
獲已饑之歎雖頻加錫賚累有蠲除尚慮澤未徧通信  
未旁及是用連宵假寐每食忘飡思所以拯我黎元臻  
其壽考或多方以革弊盡慮以鼎新庶或上下咸從人  
欲況善為國者以好生為首行王道者惟憫物是先苟  
可勝殘去殺亦冀止戈為武於戲誠明之旨既悉於斯

渙汗之恩夫何所愛可大赦天下自咸通七年十一月  
十日昧爽以前大辟罪以下已發覺未發覺已結正未  
結正繫囚見徒罪無輕重咸赦除之唯犯十惡叛逆以  
上故殺人官典犯賊不在此限持杖打劫必欲害人苟  
遇支敵必行殺戮拒敵追捕肆意奸兇并故殺人者雖  
已傷未死已死更生意欲殺傷偶得免者並同殺人法  
處分其賣毒藥開劫墳墓及別獄之內官吏推斷不平  
因成冤濫無問有賊無賊不在原宥之限朕君臨四海

子有兆人常恐萬類之中一物失所况雲南素推誠節  
久慕華風顧帥臣撫御乖失不諭朝旨遂令侵擾邊隅  
初陷交邑旋侵越窩積移星歲彌縱干戈靡思量力之  
言曾無事大之禮軼我疆理勞我隄防爰用徵兵諒非  
獲已鋒刃之下必有殺傷每念於懷良深慚悼寧屈已  
以徇衆不窮兵以害人斷自予懷更宏招諭應南安邕  
州西川等道諸軍兵士各守疆界不用進師乃委劉潼  
審詳事機明加曉諭如能重修和好信使如初朕當虛

懷一切不問雲南先差專使昨已有詔旨處分其先配  
隸習讀質子各本道供給續當指揮安南邕管西川三  
道將士皆踰山越海擐甲荷戈志切勤王誠深報國固  
內侵之封域收已失之城池盡欲捐軀咸思賈勇深明  
歷數終始一心言念忠勤誠用嘉歎今南蠻已加撫招  
冀就弭寧日下但嚴守封疆且備要害雖未用更圖攻  
討亦未可便絕訓齊其將士等義感風雲志諧金石屯  
營既久立效已多大功將成懇節無奪候其歸款別有

指揮仍委劉潼高駢李耽等具此慰勞以副予懷其三  
道軍糧地界懸遠致其盡力當有充腸如諸道戎兵未  
免饑餒因之殞命尤用傷懷宜令常宙劉潼嚴加條疏  
丁寧期限無缺供饋或致失時其赴府三道行營兵有  
親老及妻子在家者各委本道切加存恤勿使凍餒悽  
惶俾無迴顧之憂以勵當鋒之志其諸將士勇敢用命  
當鋒歿身義節可嘉孤弱是念並委本道節度使據所  
申報各須安存如血屬單弱不能自存者即厚加給卹

遺骸在野深可憫嗟今春已降德音盡令優給收葬尚慮暴露未契幽陰今更舉明用慰泉壤宜令所在長吏訪尋收斂如法瘞藏仍以酒醪殷勤奠酬應三道兵士經過累路州縣供應頓遞微配問里水程船夫陸路車役勞弊斯甚疲瘵可哀其岳州湖南桂管邕容管內沿路州縣今年二月二日德音已蠲放今年夏秋兩稅各一半尚恐鄉村未泰更要加恩宜於今年夏稅正錢每貫量放三百文沿路州縣亦甚凋傷先未霑恩今須優



假宜於來年夏稅正錢量放一半仍各委本處長吏親  
自點檢明閱簿書勿使恩不布於疲羸幸或生於桀黠  
副予深意必及遠人誠信之道蠻貊可行苟或未孚其  
肯懷惠應安南邕州容州黔南西川諸溪洞酋長首領  
務加優恤諭以恩信若須節級頒賜官秩賞給者委當  
管速具分析聞奏京畿之內蝗旱為灾稼穡不收凋殘  
可憫其京兆府今年青苗地頭及秋稅錢悉從放免仍  
並出內庫錢二十四萬五千三百六十餘貫賜官府司

充填諸色費用河南及同華陝虢等州遭蝗蟲食損田苗奏報最甚除合放免本色苗子外仍於本戶稅錢上每貫量放三百文如今年秋稅已納即放來年夏稅其諸道有蝗蟲甚處並具奏聞亦議蠲減其河南府水災之後仍歲飛蝗想彼蒸黎尤多凋瘵宜別賜鹽鉄河陰人運米三萬石委崔瑋充諸色用其諸道州縣應有逋懸兩稅斛斛青苗地頭榷酒等錢既存書簿不免徵剥咸通三年以前者並一時放免從四年至七年其中有

准勅蠲者亦不得因此重徵京畿之內供億事繁色役  
差科曾無虛日黎人困苦深可憫傷更有逋懸日久徵  
迫無由收歛徒繫簿書應京兆府諸縣從大中八年後  
至咸通六年應欠諸司稅草斛斗糖棘番匠知食使玉  
蕚及府司欠延資并度支戶部錢物及賑貸折糴粟并  
諸縣欠填省修堰埭等錢足莊宅監察使拆寺并佛堂  
材木樹等價及欠左右神策軍捉賊賞錢及諸縣應欠  
咸通三年至六年合送府夏秋稅錢物斛斗并趙越莊

田地租及諸縣咸通三年至五年賑貸粟并長安縣大中八年先借太倉粟充賑貸除已納外餘欠斛斗等並從放免兼簿書一時毀序從今年以後別立帳內庫一年支放費用雖廣有司積久追呼固多虛繫簿書頗為煩弊朕方宏儉約深軫凋殘特示優矜用蠲逋責應度支積欠大盈庫年支足段絲錢從太和八年以後至咸通元年以前並宜放免及欠瓊林庫年支金銀錫器銀稜器皿雜物等自開成五年以後至咸通元年以前並

宜放免左降官量移近處已經量移者更與量移如後  
資者任取本官選所數集丁憂放還者服闋日各與量  
移并別勅因責降除正員官所司亦與處分其左降官  
及流人先有官者如已亡歿各還本官失爵痕累禁錮  
者並從洗滌左降官并流人元勅令終身勿齒及長流  
遠惡并云縱逢恩赦不任量移者並與量移如已亡歿  
者並許歸葬如緣葬事困窮不能自濟者委所在官吏  
量給棺櫬優恤發遣中外前資見任官中其有頃因瑕

累未階錄用者并左降官如事情可恕才行足稱者委中書門下量加簡拔隨能錄用戎狄款塞邊陲無虞或使臣因備制弛慢切在搜訪利病濟便兵農勿以久安遽忘遠慮所宜常加備境每切訓戒將宏綏撫之功須為經久之計其邊上方鎮本軍兵數節度使皆位崇元帥誓立殊功必能閱軍實以靜邊撫單寒以和衆素有定額固非空文然亦慮或過犯逃匿死亡停解不便招募缺額遂多並須檢勘分明仍委御史三司院並加察

訪即時聞奏江淮諸州百姓只合輸本分苗稅不合分外差科多為所在長吏權立條流臨時差配或強名和市都不給直自今除納本分苗稅外一切禁斷牧守之任慈惠為先欲安遠人須求廉吏如聞邕容桂廣等道管內刺史每州皆管三縣人戶不少其間選用尤要得人訪聞本道觀察使所奏監州官多是本土富豪百姓兼雜色人例皆署為本道軍職或作試銜便奏司馬權知軍州事既不諳熟文法又皆縱恣侵欺多取良家以

為奴婢遂使豪酋搆怨溪洞不安若不條流生人轉困其邕容桂廣等道管內自今以後刺史必須精選賢良久歷官途不越資序者然後許奏請其軍職試銜並在奏署限藩條之例刺舉是資郡政之方邑宰是選斯紀綱具設次第相臨苟皆推公必無敗政如聞近者廉車殊無刺舉牧守率務并容邑宰非才疲人罹弊必在懲革以惠惇嫠自今以後委觀察使專刺舉之職如郡守不理或臨財不廉酬飲是營獄訟靡息以時奏劾按



罪定刑如藩方不謹察廉或致下人上訴推覆得實觀  
察使別候勅旨本判官遠加譴罰其郡守亦仰察訪縣  
令如或有過不舉停任後別有處分錄事參軍重加削  
罰如刺史縣令有異政灼然可舉者仰其錄奏必議超  
升人命至重在慎典刑國章苟隳必多枉撓近日執法  
之吏罕得其人或制勅不行曾無提舉或奸巧為患莫  
能辨明遂使可死者生可生者死而又縲紲繁擁斷決  
淹延乃致怨嗟或成灾沴予懷懔懔寢食靡寧宜委御

史臺刑部大理寺慎擇官吏皆須素能折獄俾務盡心  
則人必無冤法當盡理天下州縣官等皆罕習律令莫  
知重輕唯任胥徒因多枉濫委本道觀察使覺察聞奏  
又刺史縣令多務遊宴不思官常決遣既妨囹圄自滿  
永言冤滯豈不由斯委觀察使表率條流以懲深弊度  
支鹽鉄戶部三司欠負錢物頻有赦令據年額節級矜  
蠲如聞所司尚有徵迫妄行可徵可放多因奸吏恣情  
遂使恩不及夫窮危事無補於經費其諸色人戶所由

等應欠三司錢物自大中十二年以前並宜放免縣道  
之間郵亭具列行李供億格勅著明如聞節度觀察刺  
史等所經過不遵品式公券之外私費至多或在道途  
有六百七百人行李所在地主務求交歡別差吏人號  
為置頓必皆率配弊及疲人自今以後所在長吏切加  
遵守格文不得違越赦令所在欲蘓疲瘵如聞遠處州  
縣告示不得分明今要條流水為定制赦書到後各委  
本道全寫錄於縣門榜示但緣事理煩細紙數煩多減

放矜蠲頭項埋沒鄉村百姓無因得知宜令所在長吏  
細詳各據本處百姓合得免科段一一豎項作小牒於  
要路曉諭令百姓知悉宗室子孫不合凌替班列之內  
人數至稀宜令宗正寺搜擇宗子有行義文學吏事堪  
有清實者具名聞奏委中書門下量才叙用如在郡縣  
年已蹉跎士行可弊困於寒餒宜委所在長吏隨分驅  
策優假如聞編戶之中素非宗室因緣識故寫錄諸書  
授入宗枝妄認房籍恃憑攪擾侵害鄉村近日此徒敗

露非一雖已行法未絕根源從今以後委所在長吏切  
加收獲如涉疑妄即收錄聞奏當痛懲治用安里閭前  
代為賓崇德理合頒恩二王三恪及文宣公各賜物五  
十疋衡琬拱衛執玉會同俾申懷遠之恩用展酬勞之  
錫神策六軍威遠營金吾及皇城應緣御樓立仗將士  
等各賜物有差鴻臚禮賓院應在城內蕃客等並節級  
賜功播一時名流千古念其後裔觀以將來故尚父子  
儀贈太師晟贈太尉秀寔各與子孫中二人八品官顏

杲卿張巡許遠南霽雲子孫中各與一子出身中書門下儀制官及內侍省內教並特加一階勳著變和道彰鎮撫牧守宣力卿士叶心永言盡瘁之誠宜給追榮之典中書門下及節度使帶平章者祖父母父母並與贈官封已經追贈者更與改贈京文武常叅官東都留守度支鹽鈔等使諸道節度觀察都防禦經畧等使及神策金吾六軍將軍大將軍威遠營鎮國軍等使父母已歿未經追贈者量與贈官已追贈者亦與改贈父歿母存

未封邑號者父見存未有官者量與致仕官其贈任常  
叅官出為刺史縣令分司等官今已得替兼前資即官  
以上官其父母並准有見任常叅官例與追贈挂冕相  
先懸車自遂紀綱之僕軒陛攸陳宜升階級之榮式進  
勲封之寵内外文武及見任及致仕官三品以上贈賜  
爵一級四品以下加一階神策六軍金吾威遠營皇城  
等將士普恩之外各賜勲兩轉天下百姓年九十以上  
各贈米五石絹二疋綿一疋羊酒有差仍令本縣令就

家存問今州府方員多不給付所用無幾係體則深宜  
令以上供餘錢物充給訖各具分析聞奏

咸通八年五月德音

朕聞唯天為大唯堯則之施及文王昭事上帝朕退思  
古訓順考前聞仰止於皇王之間規範於堯文之際始  
如徒涉而望超溟渤中若策蹇而求躡雲霄思逮於三  
希之則至由是力於恭己說以濟人九載於茲一致不  
怠然而德未甚腆信未甚孚雖懷汔可之詩敢企康哉



之咏尚賴社稷降祉祖宗垂休兵革向寧朝野斯人自  
頃誕施渥澤冀獲霑流猶慮莫及昭蘇逾多困乏今則  
夏田豐稔倍於常時不足之憂暫免興慮又以西成未  
保蟲蝗是虞永惟惠恤之宜庶叶銷禳之要苟能利於  
百姓賴於四方可使稼穡有年邊疆無事則唯恐不及  
豈憚於必行是用更理闕遺載新提舉一陽斯始爰開  
蕩滌之恩晏陰將成式經矜蠲之令副我誠切在爾司  
存應京畿天下見禁囚徒暑毒之時要令疎理牢獄之

內慮有滯寃宜令臺府及該軍司并所在州縣長吏據見禁囚徒德音到後七日內親詳罪名疏理訖聞奏不得更延引時日除非巨蠹有碍去年赦條外餘並節級遞減一等從輕處分左降官及諸色流人雖累有赦令皆已霑恩欲其悔過自新豈愜頻施沛澤經去年赦條已得量移者更與量移合復資者准前例處分其去年十一月十日後至今年五月以前續有左降官及流人亦便與量移如令放還者所司速與處分內人久在官

者常膺使令不唯勤勞可憫固亦親愛是思宜令揀選  
五百人放出各歸其家屬俾無離怨用叶推恩見在宮  
人尚令揀放諸節進奉宜有指揮應諸親及公主等每  
年端午及延慶并妃嬪生日所進女口自今以後宜並  
停進鷹鷂之設本為畋遊朕端居穆清不好馳騁所宜  
解放以遂物情左右神策軍各放二十聯五坊放三十  
九聯飛龍放二十一聯其左右神策軍每年進鷹鷂於數  
內停減春秋二社兩進九月十五日各停進鷹一聯共

停一十四聯應租莊宅使司產業莊碓店鋪所欠租斛  
斗草及舍課地頭等錢所由人戶貧窮無可徵納年歲  
既遠虛繫簿書緣咸通七年赦條不該人宜從大中三  
年以後至大中三年以前並宜放免京兆府奏雲陽等  
一十二縣百姓論去年宿種麥苗下子之後旋被蝗蟲  
食損今年盡不滋生雖京畿之間去冬蠲放不少但以  
疲人懇訴須務哀矜已令府司差官巡檢如有損處特  
與減放今府司具合放數詣寔聞奏成役辛苦道途綿

歷將還鄉土在贍供須安南邕州已奏放回北軍其於  
頓處過本州縣界須如法先自備辦擬排比切不得臨  
時差配百姓及借索擾人仍錄前後德音赦條於鄉村  
分明榜示不得違越仍委所在長吏嚴立條制專加覺  
察枷禁所施在防奸蠹舉便欠負未涉重條如聞府縣禁  
人或緣私債及有錮身監逐無計營生須有條流俾其  
存濟自今日以前應百姓舉欠人債如無物產抵當及  
身無職任請俸所住州縣及諸軍司須寬行期限切不

得禁錮校料令其失業不許利上生利及迴利作本重  
加徵收如有違越勘實奏聞去年德音赦令條流事  
件極多責其普及生靈惠沾寰宇聞所在未盡施行今  
重舉明俾無留滯宜令天下長吏差清強判官專事勾  
當切更分明檢校一一據節施行訖奏聞如更因循必  
行朝典所差判官速具名銜分析聞奏好生之德宜及  
禽魚卵育之時須加條制舊勅每年起三月一日至五  
月末不許採捕蜚禽走獸雖有勅禁尚恐因循宜令臺

府及諸軍司及時禁之月嚴更提撕勿使違犯儉德之  
修聖賢所重近日俗多澆靡時尚矜誇朕慕素風思遵  
儉制去歲赦文之內已曾明有指揮所宜克副朕心用  
革奢僭東川每年進蜜浸荔枝道路遙遠勞費至多自  
今已後宜令停進布告中外稱朕意焉

咸通十三年五月疏理刑獄勅

勅慎恤刑獄大易格言語曰如得其情則哀矜而勿喜  
而獄吏苛刻務在侮文守臣因循罕聞親事以此械繫

之輩溢於狴牢追捕之徒煩於簡牘實傷和氣因致疹氛  
況時屬煬蒸化先茂育並赦罪戾式順生成應天下所  
禁繫罪人十惡忤逆及故意殺人合造毒藥持杖行劫  
開發墳墓外餘並宜疏理釋放如或信任人吏多有生  
情繫留續察訪得知本道觀察使判官州府本曹官必  
加懲譴識慢勅到後十日內疏理分析聞奏

光啟三年七月德音

朕聞天以陽居大夏地以陰居玄冬是明任德而不任



刑也在帝舜則舉兩階之干羽在成湯則開三面之網  
羅是明君好生而不好殺也朕以眇身嗣膺大寶垂三  
百年之宗社奉十七聖之威靈夕惕乾乾不忘寤寐豈  
謂釁生於地謫見於天烟塵暴起於兩京地豕交橫於  
四野宗廟之饗干戈莫尋益獲戾於上玄俾流災於下  
土前歲才歸大國又及播遷信由倚任之非良有愧精  
誠之下至貶衣損食庶塞乎憊違履薄臨深每增於戰  
懼方修郊廟且復京畿而駐蹕才安還宮可候虔誠罔

通於穹昊兵革又起於藩維蓋以朕不敏不明君臨兆  
民仁不能叶生成之旨義不能符斷割之幾智無周物  
之明信寡應時之用陷蒸黎於塗炭致王室之艱難綿  
歷歲時於茲八稔顧茲頽秦職朕之由且朕深宮九重  
跬步千里目雖視而不見耳雖聽而不聞罪在朕躬痛  
入骨髓但仰天而投泣恨無地以容身撫几興言何嗟  
及矣今則素服避殿減膳撤懸食無海陸之珍耳絕管  
絃之樂唯加惕勵冀遠感通將宏及物之恩在布惟新

之令應天下見禁囚徒除十惡忤逆官典犯賊持杖劫殺合造毒藥開發墳墓其餘罪輕重遞減一等左降官各與詳所犯量移如已經兩度量移者宜並放還仍仰所在州府限德音到日准勅處分訖分析聞奏左降官及流人身有死者並許歸葬其鳳翔府所管吏軍百姓等切令招葺務令歸安縱與李昌符關連情非巨蠹及父兄在隴州城内事出脅從者一切不問其隴州城内軍吏百姓不得輒令損傷戴禮之文務先掩骼應有未

葬骸骨及橫尸在路委所在長吏速與收歛藏瘞其自  
兵荒以來殺傷之處委所在州縣以孟冬行賞死事之  
日於北郭除地用雞豚設祭所貴以導和氣且慰幽魂  
前年冬未出京之時如聞文武朝臣愴惶奔竄或因凍  
餒或遭鋒刃遂致斃踣深可憫傷自累年來朝臣有因  
謫官遂致殞身或制使遽聞枉橫宜令中書門下尋訪  
各與贈官孝弟承家忠貞奉國既顯揚名之道宜加布  
澤之榮應内外文武臣及諸道節度觀察防禦使隨駕

諸軍頭亡父母並准舊例各與追贈追封如有母親見  
存者各與進封左右神策及隨駕諸部兵士等荷戈負  
羽侍衛勤勞既効節以輸誠寔竭忠而排難永言勲績  
宜有甄酬其隨駕諸部宜各與勲爵未有功臣名號其  
將士次第填補不得虛被衣賜有紊典章如覆視不寔  
節度使奏取進止本判官重加貶責其邊地沃壤極多  
歲收可望如聞耕牛素少戍卒苟安唯長蒿菜俱乏衣  
食委節度使良田之處更議添人均配膏腴令其耕種

制置利便須令酌中其南山及平下党項盡是百姓須  
令保安長吏若能撫綏蕃人自然寧息切不得妄有侵  
擾致其怨嗟常須使商旅往來部落不得阻塞致理必  
先於尚儉傷風莫甚於窮奢朕苑囿不修珠玉不寶所  
思敦朴每務去華如聞卿大夫士庶近者競崇侈靡莫辨  
等威服翫車輿皆越制度蠹於教化朕甚憫焉卿大夫  
當助我紀綱為人表則宜修儉約以變澆風其京師應  
有奢僭違令式者聞之當行朝典應諸道申奏有草賊

州縣本皆齊人迫於餒凍竊聚徒侶遂肆猖狂並仰所  
在長吏明加曉諭有能自新有罪一切不問如稔惡不  
悛事狀難恕委所在長吏設法擒捕不得漏網上京諸  
司及天下州府負犯逃走罪人今春已降德音除本罪  
合至死者從咸平五年以前並停追捕歸還整其數至  
多慮被奸人遞相恐動悉委所在告諭令其樂業無致  
驚惶如歸復者惡跡貫盈不能改過更有違犯尋勘不  
虛便仰併舉前愆一時痛斷不得容隱侵害良善江淮

商賈業在舟舡如聞近日官中攄借甚苦或傾奪以充運米或題關以備載軍非理滯留散失財貨州縣雖云和雇商人焉敢請錢本求錐刀番成損折縱有冤屈豈能申論道路怨嗟莫甚於此自今以後委所在長吏切加禁斷其所合供過軍等舟舡唯許容載航舡便給見錢雇召如見裝貨物者切不得強令騰倒其州縣所合雇舡脚多無本色錢物皆是率配疲人起今以後並仰以上供錢充給如有茶鹽舟舡關繫三司權課者任准



元勅處分自蠻寇侵擾連歲用兵耗蠹生靈海運為甚  
驅我赤子深入滄波覩駭浪而魂飛汎洪濤而必死繼  
有覆溺多不上聞仍遣陪填急於風火哀其已死之衆  
不可復追念茲將斃之徒用延餘息應江淮四道運糧  
所有沉覆損米損船綱官所由舡戶及元發州縣合陪  
填者並從放免更不得校料追徵應闕海運留係勘者  
並一時釋放唯造舡官吏須有勘覆者不在此限近日  
蟲蝗米穀翔貴所在州府須使通流況閉糴之條著在

格令近聞州府通舟舡處不得約勒商人固違勅旨等  
候江淮錢物到各宜優賞以身許國致命捐軀攄茲盡  
瘁之誠宜飾始終之典應自兵興以來所在都頭大將  
身歿王事未曾經贈官者仰本道各與分析聞奏量功  
勞優與贈官如有子孫仰本道各與補職務令存濟行  
營將士如身歿王事者其衣糧並仰給與兄弟男姪如  
有父母無給養者切在安存勿令凍餒雖累有處分可  
一切施行或有義士忠臣圖功立事身當國難身歿賊

鋒者宜委中書門下優與贈官兼訪子孫俾沾祿任用  
伸激勸冀洽恩榮扈從之勞辛勤不忘若無升進何以  
獎酬其到興元文武官等宜令優與遷改如已經獎擢  
者特與量加階爵自貞觀之後建中元年以來翊戴皇  
家扶持宗社勲績已銘於鼎鼎謀猷實在於冊書如聞  
子孫或多凌替贈太師汾陽王子儀臨淮王光弼西平  
王晟咸寧王渾瑊贈太尉秀實顏真卿顏杲卿以下子  
孫宜各與一子九品正員官其子孫有才術可稱委中

書門下量才叙用以勸勲賢律有駢率之科是宜原宥  
人無險詖之路固可矜寬其陷偽庭官寮多因迫脅旋  
宜叙用勿使棲遲左右神策軍及沿邊諸鎮將士或隄  
防藩寇或控扼封陞戴甲荷戈眠沙卧磧無抱子弄孫  
之樂有離鄉去里之嗟自亂離以來衣糧多缺顧茲疲  
弊深軫朕懷蓋緣諸道賦稅未來致使如此宜委度支  
戶部及鹽鈇使各委官吏催促江淮及三川上供錢物  
充給兩軍及邊鎮將士衣賜如催勘有序其官吏各與

優獎如全無次第必議懲責於戲朕以寡昧託億兆之上不能克相上帝寵綏四方履地戴天痛心疾首實在股肱叶力藩翰同心保列聖之洪基佐冲人之薄德共成興運以副殷憂為政之方實資共理且一邑之政由乎令長一郡之政由乎牧守一方之政由乎藩翰之臣夫政修於上則化行於下可以安人治國可以阜俗康時此古今之通理也自乾符以後廣明之前節制廉問之臣州牧縣宰之吏或掄擬不當或詮擇非良鎮藩翰

者則惠養撫綏之術蔑聞居牧宰者則貪恠苛虐之風益甚或淫刑濫殺或剥衣及膚業亡家破父南子北多使饑者不得食寒者不得衣奔竄道途踰藏山谷耕桑甚廢旱沴相仍結為仇讎聚為盜賊冤憤之氣上達於九天激怒之威橫行於千里虔劉郡邑屠戮生靈懷逆節者得以逞其兇桀恣為暴擾蘊忠誠者雖欲平其禍亂益費機謀既往難追將來可保切在速加激諭漸致和平倘或刺史知惠養之方縣令有撫綏之術公清克

已廉慎當官績效彰聞當與遷擢如或貪殘不理害我  
疲人委中書門下重加懲殿仍令諸道長吏觀察判官  
切加察訪每歲具善惡奏聞自屬兵戈全妨耕稼遂令  
墮畝盡變汙萊蓋以殺傷之餘流亡益甚宜加招撫漸  
復農桑如有刺史縣令招收戶口開墾荒田置買耕牛  
修置農具者委所在觀察使精加點勘具數聞奏當據  
課効高低優加升獎朕端拱穆清思弘理道用憂勤而  
補過守慈儉以律身上展孝思下康庶務其於祀事尤

在精崇常憂多難以來有乖敬恪至於牲幣之數醯醢之宜必盡吉蠲免或簡易宜委所司切切鈐轄不得因循夫儉者德之恭侈者惡之大唐堯土階三尺夏禹菲食卑宮先聖遺風後王軌範其有司合進常膳三分宜減一分六宮嬪御見在者人數不多此外不令更有添置或有因緣寇盜流落外方宜委所在長吏便與嫁遣任自營生不用送到駕前冀免虛有勞費自此諸道更不用進聲樂及女弟子歌舞衣服紋繒組繡雕鏤珠璣



頗害女工實妨農事奇技淫巧往哲所譏况遇艱難尤  
宜儉素其諸道不得進奉紋繡宮錦雕鏤輕靡彩章之  
物五坊鷹犬以備時蒐方當勤恤之時寧有畋遊之樂  
其鷹犬並今解放不用更置諸道亦不須進送艱難已  
久增修未知展端披圖良多內愧且以為白鳥丹鵲不  
如子孝臣忠甘露醴泉未若風調雨順自今以後諸道  
所有祥瑞並不要圖畫進獻補成教化實在賢良用副  
旁求必資博採宜令文武常叅官舉刺史縣令有異政

殊績者淪滯山林有奇文異行者所期表異無或面欺  
孝子順孫義夫節婦各加旌表以示鄉閭父老有年九  
十以上者賜帛二疋粟五石仍令所在以上供物交付  
瘖聾跛癡鰥寡孤獨者委所在切加存恤無所恓惶名  
山大川興雲致雨冀保順成之歲宜申望祀之儀太清  
宮及驪山華岳南山廣惠宮炭谷湫鳳翔啟聖宮邠州  
要冊湫宜各差官禱謝其諸道應有祠廟標於祀典及  
先聖靈跡各委長吏差官精誠啟告凡闕百姓安危利

病俾其蘇息切在撫綏訛弊既多固難徧舉仰所在長  
吏審詳利害一一條奏所冀凋殘漸成完緝勿辜委遇  
副我憂勤於戲朕為人君父累屬夫亂離一發言未嘗  
不兢憂一舉足未嘗不愧悼徒思罪已安敢尤人中外  
臣寮宜悉朕意

時令

令史官條奏每月應所行事詔

王者欽若天道率由時令考六官之化修五紀之法故

得災害不生休徵游委朕紹膺洪業於茲六年每惇政  
理思致和平而陰陽未調蝗水仍集天之垂誡朕甚懼  
焉夫正月東郊祈春賞事孟冬北陸迎寒恤孤叅四序  
之運行稽五材之動用弗協所尚或罹於咎且事必師  
古禮重執文將命有司允迪厥訓自今以後每八月史  
官條奏應所行事當斟酌古典用孚於休宣布朝廷使

知朕意

開元五年  
十月

歲初處分德音

勅天地以大德生羣有聖人以大寶守萬物古者受命之君謂之承天之序明有所代夫豈徒然若道無欽崇命不永保帝實臨汝人曷戴君朕所以每期庶乎合於仁覆之意也夫伏羲神農黃帝堯舜或誅而不怒或教而不誅彼亦何為獨臻於此朕自有天下二紀及茲雖未能畫衣以禁亦未嘗刑人於市而政猶踳駁俗尚澆醜當是為理之心未返於本耳凡人豈不仁於父母兄弟不欲於飲食衣服乎而卒被無孝友之名溼飽之困

其故何哉蓋未聞義方不識善道或任小智而為詐或見小利而苟得致遠則窮繼之以暴已而身受戮辱家不相保愚妄之徒類多自陷獄訟之弊恒由此作吁可悲乎亦在教之不明也蓋刑罰者不得已而用之天下黔黎皆朕赤子以誠告示或知所歸何必用威然後致理先務仁恕寧不懷之且五常循行豈須深識六親和睦何待丁寧自宜勉之以副所望刑措不用道在於茲今獻歲之吉迎氣伊始敬順天常無違月令所由長吏可

舉舊章諸有嫗伏孕育之物蠢動生靈之類慎無殺伐  
致令天傷九土異宜三農在候聚衆興役妨時害功特  
宜禁止以助春事至若家有征鎮人或孤惇物向陽和  
此獨憂悴良可憫也亦宜所由隨事優恤蓋不體仁無  
以為長人不知道無以為用心故道者衆妙之門而心  
者萬事之統得其要會義可以兼濟於人失其指歸生  
不能自全於已故我玄元皇帝著道德經五千文明乎  
真宗致於妙用而有位者未之講習不務清靜欲令所

為之政何從而至於太和也百辟卿士各須詳讀勉存  
進道之誠更圖前席之議至如計校小利綜緝煩文邀  
名直行去道彌遠違天和氣生人怨心朕甚厭之所不  
取也各勵精一共興立化俾蒼生登於仁壽天下還於  
淳朴豈遠乎哉行之可至其老子宜令士庶家藏一本  
仍勸習讀使知指要每年貢舉人量減尚書論語一兩  
道策准數加老子策俾敦崇道本附益化源朕推誠與  
人有此教誠必驗行事豈垂空言今之此勅亦宜家置



一本每須三省以識朕懷

開元二十一年正月一日

唐大詔令集卷八十六

唐大詔令集卷八十七之卷九十八並闕文

--	--	--	--	--	--	--	--

欽定四庫全書

唐大詔令集卷九十九

宋 宋敏求 編

政事

建易州縣

置乾封明堂縣制

置鴻宜鼎稷等州縣

却置潼關制

置營州都督府制

改梁州為興元府詔

城鹽州詔

置宥州勅

置行蔡州勅

置遂平縣勅

置孟州勅

分嶺南為東西道勅

降徐州為團練勅

建徐州為感化軍節度勅

升華州為興德府勅

修復故事

諸衛隊仗緋色幡改赤黃色詔

復尚書省故事制

釐革匭函進狀勅

釐革諸留中不出狀勅

建易州縣

置乾封明堂縣制

鸞臺元天著象於紫微厚地區域於赤縣外崇四岳伊  
帝闡其宏規旁別九州玄王劬其丕績所以料茲物土  
畫野分疆相彼人事觀時濟俗開物成務理則有然高  
祖皇帝誕應靈命肇開景業括囊軒頊孕育胥庭太宗  
文皇帝大聖登期自天縱哲撲崑崙之猛燎拯滄海之  
飛流魏魏蕩蕩無得而名朕以虛薄夙奉瑤圖承累德



之鴻猷履會昌之嘉運中外禔福遠邇乂安仰薦成功  
升裡岱嘯緬維嚴配祇建合宮感事開元聿光先德  
俾我黎獻永賴隆平寧濟之方實資寬簡鑒寐凝想思  
致厥塗以為翼翼上京率土攸仰剪華抗堞貫渭流瀾  
城闕崇嚴都邑夷敞戶口盈積市獄殷繁東西兩縣官  
曹尚少在於撫字事或難周至於詞訟綜理時闕須分  
所職各使兼濟其長安縣宜置乾封縣萬年析置明堂  
縣並於京城內近南安置其戶口即於兩縣逐便割隸

應須官寮并公解等一事以上並准長安萬年兩縣各令所司處分奏聞庶使憂勤之懷獨映於前古建元之慶長垂於後葉

總章元年十一月二十日

置鴻宜鼎稷等州制

鸞臺朕聞先王彊理天下也莫不料其土宇相其地宜分五服以應財成宅三川而適通變辨方樹辟協和之道以降置郡罷侯經始之圖載遠而區分或異制度罕同連率法於在鎬牧守議於起沛官稀則政毀地狹則

人勞義在隨時期於致理我大周席蘿闡化夢梓登期  
通三授玄扈之濱得一昇翠瀉之內維高設險聳危峯  
於少室在河稱防導洪波於太史卜茲洛食是曰臬區  
物產孔殷形勝斯在朕仰膺睿命俯叶樂推即瀝澗之  
基恢鼎革之運珍符寶貺賁發郊藪佳氣榮光昭煥州  
澤建明堂而陟配立清廟以嚴禋方闡隆周之業以光  
卜年之兆況成王定鼎此則餘基永言朝貢實歸中壤  
是霜露之所均當水陸之交會庶齊勞逸無隔遐邇作

制王畿雖憲章於故實緬惟帝邑未折衷於新規宜弘  
自我之典式廣來蘇之澤但京兆之地舊號秦中廼睠  
編氓最為繁殖一州獨治事多壅滯宜令雍州管內析  
置五州其間以雍州以西安置潼關即宜廢省然以千  
里之內舊制通畿征賦所出事資廣遠又王侯設險以  
固其國若無襟帶何以為守雍州并所析州同州太州  
並通入畿內洛州南面北面各置關庶食采之地自分  
湯沐之邑棄縹之客更從軒蓋之遊其雍州舊管及同

太等州土狹人稠營種辛苦有情願向神都編貫者宜聽仍給復三年百姓無田業者任其所欲即各差清強官押領並許將家口自隨便於水次量給舡乘作數次進發至都分付洛州受領支配安置訖申司錄奏聞朕聞人惟邦本本固邦寧將以不肅而成既庶而富欲令率土黔黎咸得遂性勞來安堵人不失業其有諸州人或先緣饑歲流宕亡歸或父兄去官因循寄住為籍貫屬恐陷刑名徃苒多時未經首出衛士雜色人等並限

百日內首盡任於神都及畿內懷鄭汴許汝等州附貫  
給復一年復滿便依本番上下其官人百姓有情願於  
洛懷等七州附貫者亦聽應須交割及發遣受領並委  
本貫共新附州分明計會不得因茲隱漏戶口虛蠲賦  
役并新析五州三面及雍州以西置關處所司具為條  
例務從省便奏聞

天授二年  
七月九日

却置潼關制

鸞臺山河作固肇自往圖關梁是修仰惟前典朕情存

大朴志在無外成臯姬隄勿用咽喉函谷秦封解其衿  
帶欲使雁行靡拾鶉居不擾而甿俗澆弊浮惰者多非  
所以禁絕末游作限中外事資權變理貴從宜其潼關  
便可由舊安置應須修補及官典兵防一事以上所司  
速准例處分其神都四面應須置關之處宜令檢校文  
昌虞部郎中王玄珪即往檢行詳擇要害務在省功斟  
酌古今必令折衷還日具圖樣奏聞

聖歷元年五月十九日

### 置營州都督府制

朕聞舞干戚者所以懷荒遠固城池者所以款戎夷我  
國家頃有營州茲為虜障使北戎不敢窺覘東蕃由其  
輯睦者久矣自趙勰失於鎮靜部蕃因此攜離頗有負  
塗之睽旋聞改邑之歎高墉填塹故里為墟言念於此  
每思開復達奚饒樂郡王李大酺賜婚來朝已納呼韓之  
拜契丹松漠郡王李失活遣子入侍彌嘉旻侯之節咸  
申懇請朕所難違宜恢遠圖用光舊業其營州都督宜  
依舊於柳城安置



改梁州為興元府詔

勅自昔多虞順時而動古公避狄兆永祚於岐下高帝  
徙蜀建雄圖於漢中王跡所興子孫是奉覩遷居之遐  
阻知致業之艱難矧天下為家不常厥邑王者所至四  
方會同崇號設都於是乎在朕遭罹寇難播越梁岷蒸  
庶煩於供億武旅勤於扞衛凡百執事各奉厥司人皆  
競勸物以豐給嘉乃成績予懷不忘今大憝已除京邑  
甫定將旋法駕展敬園陵眷於是邦復我興運宜其崇

大以示將來古者天子省方則問百年恤百姓以頒慶  
賜以懋勳榮用弘布澤之恩式慰來蘇之望宜改梁州  
為興元府其署置官資望切並與京兆河南府同南鄭  
縣升為赤縣諸縣並升為畿縣見在州縣官各令終考秩滿  
日放選依本資處分耆壽與板授五品仍並賜緋先已  
賜緋者並賜紫典正等各賜勲五轉百姓除先減放稅  
錢外更給復一年洋州宜升為望州見任州官亦令終  
考秩並諸縣官等各減兩選無選可減者各加三階應

山南西道節度下將士除扈從迎駕已經改官者餘並  
即與甄叙宣示有衆明知朕懷

興元元年六月

### 城鹽州詔

設險守國易象垂文有備無患先王令典况修復舊制  
安固封疆按甲息人必在於此鹽州地當衝要遠介朔  
陲東達銀夏西援靈武密邇延慶保捍王畿乃者城池  
失守制備無據千里亭障烽燧不接三隅要害役戍甚  
勤若非興集師徒繕修壁壘設攻守之具務耕戰之方

則封內多虞諸華屢警由中及外皆靡寧居深惟永圖  
豈忘終食顧以薄德至化未孚既不能復前古之封致  
四夷之守與其臨事而重擾豈若先備而即安是用思  
久遠之謀修五原之壘使邊城有守中夏克寧不有暫  
勞孰能永逸宜令左右神策軍及朔方河中絳邠寧慶  
兵馬副元帥渾瑊朔方靈鹽豐夏綏銀節度都統杜希  
全邠寧節度使張獻甫左神策行營節度使邢君牙夏  
綏銀節度使韓潭鄜坊丹延節度使王栖曜振武麟勝

節度使范希朝各於所部簡擇馬步將士合三萬五千  
人同赴鹽州左神策將軍兼御史中丞張昌宜充右神  
策軍鹽州行營節度使權知鹽州刺史兼御史大夫杜  
彥恭鹽州刺史兼御史大夫應所板築及緣修城雜役  
等宜共取六千人充其餘將士皆列營布陣戒嚴設備  
明加斥堠以警不虞其修城板築功役將士各賜絹布  
有差其鹽州防秋將士三年滿與代更加給賜仍委杜  
彥光具名聞奏悉與改轉其防遏將士等畢事便合放

歸仍賜布帛有差其諸軍吏士都賜帛七十疋朕情非  
為已志在靖人浴爾將相之臣忠良之士輸誠奉國陳  
力忘勞勉茂功勲永安疆場必集兵事實惟衆心各相  
率勵以副朕意

貞元九年  
二月

### 置宥州勅

勅天寶中有州寄理於經畧軍實應以後因循遂廢由  
是昆夷屢擾党項靡依蕃部之人撫懷莫及朕方宏遠  
畧思復舊規宜於經畧軍置宥州仍為上州郭下置延

恩縣為上縣屬夏銀綏觀察使

元和九年五月

置行蔡州勅

淮蔡近郊久隔皇化本殲兇虐在拯生靈況今賊黨携離相繼効順思俾貼危之俗盡霑收養之恩勞徕招綏今之所切其新除蔡州刺史楊元卿宜令與李愬商量計會且於唐州東界選擇要便權置行蔡州如百姓官健有歸順者便准勅優恤存撫令知國恩必使全活

元和

十年三月

置遂平縣勅

勅文城柵將士百姓等脅汙之中同心効順率此危疑之俗盡為忠義之人言念乃誠思加獎異爰圖改邑之制用表移風之美其蔡州行吳房縣宜改為遂平縣仍於文城柵南新城內置便為上縣權隸唐州

元和十二年四月

置孟州勅

勅昔馮異之守孟津已建軍號近光弼之保伊洛先據三城蓋以河有造舟之危山有摧輪之險左右機軸表



裏金湯既當形勝之地實為要害之郡今所置制豈限  
常規積萬庾於敖前尤資地利列二矛於河上須壯軍  
聲其河陰宜割屬孟州仍改為望縣其河清縣却還河  
南府收管縣官等並准前勅處分其東都鎮遏兵馬依  
前屬東都防禦使鄭滑汝州防戍兵各一千令敬昕權  
揮使平後續有處分

會昌三年十月

分嶺南為東西道勅

勅嶺南分為五管誠已多年居常之時同資禦捍有事

之際要別改張邕州西接南蠻深據黃洞投兩江之獮  
俗居數道之游民比以委人太輕軍威不振境連內地  
不並海南宜分嶺南為東西道節度觀察處置等使以  
廣州為嶺南東道邕州為嶺南西道別擇良吏付以節  
旄其所管八州俗無耕桑地極邊遠近罹寇擾尤甚凋  
殘將盛藩垣宜添州縣宜割桂州管内龔州象州容州  
管内藤州巖州並隸嶺南西道收管

咸通三年十月

降徐州為團練勅

勅徐州本貫支郡先隸東平建中初李洧以畏忌歸降  
遂創徐海使額貞元初張建封以威名寵任特貼濠泗  
兩州當時緣拒捍淄青犄角尤蔡務張形勢廣樹藩垣  
自寇孽冰銷區域無事武寧一道翻長亂階曾靡悛心  
殆成逋讎須為制置以削兇殘徐州宜改為本州團練  
使除當州諸縣鎮外別更留兵二千人隸屬兗海節度  
使收管濠州本屬淮南節度收管宿州地居埧口路阨  
彭門北接睢陽南臨淮甸當漕運之要蓋水陸之衝宜

置全師以臨列郡仍置宿州泗等州都團練觀察處置等使便以宿州為理所王式且充武寧軍節度使兼徐泗濠宿等州制置使其兵馬除留在徐州外仍令王式與玄質量其多少分配宿州團練使及泗州兵馬留後濠州渦口城使下如人數猶多即分隸屬淮南浙西天平充海淄青等道逐便收管各給本分衣糧其家一任相隨官中接借發遣令其存濟其割配諸道將士緣皆有家屬須令裝束每人各賜絹兩疋以戶部物充其徐州

諸縣先有鎮堡處亦量要害輕重差配人數守捉武寧  
軍大將如素有軍功及營官已至中丞大夫以上者各  
具名薦聞別加委用其餘割送充宿兩道軍前收管如  
情願住徐州者亦聽穩便王式玄質一切共為制置待  
公事分配總畢必知寧帖無事即令王式與崇憲等自  
領兩道兵馬直到汴州分付仲齊及滑州節將各押領  
送歸本道王式玄質俟許滑將士歸後既無公事便赴  
關廷別加勞獎其衙內銀刀等將官健有逃匿未捉獲

者若能束身首所在歸役者便一切不問仍准前勅割配諸道與衣糧并家口任去勅到後一月內不出陳首者即不在此限餘准詔旨處分

咸通三年八月

建徐州為感化軍節度勅

勅徐州地當沛野軍本驍雄實為壯國之都固叶建侯之制況山河素異土俗甚殷豈欲削卑挫其繁盛益緣此稔禍或至亂常罪由已招孽非天作桂林叛卒繼有逆謀塗炭生靈首尾兩歲殺傷黎庶汚染忠良所不忍

言尋皆翦滅是以卑其鎮額隸彼藩方近屬大兵以來  
饑年荐至且聞軍人百姓深耻前非願行舊規却希建  
節朕每懷軫念思致雍熙欲示渥恩特議改易既崇軍  
府要備供須宣賜宣徽庫內綾絹一十萬疋助其宴犒  
必獲周豐累歲用兵甚費國力特與借助功在節量如  
初有脅從後成亡命或未還鄉里或逃匿諸州加意招  
携各歸本業若稱自樂所止亦可循其私情貴衆士獲  
安恐一物失所用期昭泰必在均平典故具存廢興不

昧仍更鎮額威彼軍威冀覩封疆永保寧謚其徐州都  
團練使仍改為感化軍節度徐宿豪等州觀察處置等

使

咸通十一年十一月

升華州為興德府勅

勅有虞氏之為君始言省狩周襄王之告難乃曰出居  
或肆覲於他邦或播遷於近服然則地圖之內車轍所  
臨備庶官而取象拱辰入九貢而以時述職是云守宇  
皆可建都昔者德祖省方平戎服國昇漢中之列郡同



諸府以正名藩翰之光典章寔重朕越在關輔屢經歲  
時苟寬失馭之憂蓋獲視朝之所鎮國軍節度使韓建  
始者星馳感憤雪涕奉迎邀天力以來同激人情而共  
固以茲駐蹕安類覆孟邑無夜犬之驚野有春耕之樂  
今則元龜告吉六馬將還望山河而信是金湯顧宮室  
而若無風雨眷言至此我寔懷之俾慰衆心爰遵故事  
宜改為興德府其所署官員資望一切與五府同鄭縣  
升為次赤諸縣為次畿其將校等並賜華州安駐功臣

光化元年八月

修復故事

諸衛隊仗緋色幡改赤黃色詔

三王繼統質文互於相襲五德承運服色遵於必正旗  
常改制駢翰異宜所以表軍國之容合聲明之度事之  
大者安可因循而已焉國家應樞軸之期清黃鍾之歷  
憲章垂範運既屬於惟新旗幟用色義必在於改故頃  
者俯納羣議式明統緒故得天人致和風雨時若豈朕

躬菲德克廣睿圖寔累聖弘休允應景運稽古之大既有昭明文物之資理宜詳正其諸衛應隊仗所用緋色幡等改為赤黃色庶克遵於通變諒有叶於從宜其諸節度并營內軍使等亦宜准此

天寶七年七月

### 復尚書省故事制

唐虞之際內有百揆庶政惟和至於宗周六卿分職以倡九牧書曰龍作納言帝命惟允詩云仲山甫王之喉舌皆尚書之任也雖西漢以二府分理東京以三公總

務至於領錄天下之綱練覈萬事之要邦國善否出納之由莫不處正於會府也令僕以綜詳朝廷丞即以彌綸國典法天地而分四叙配星辰而統五行元元本本於是乎在九卿之職亦中臺之輔助小大之政多所關決自王室多難一紀於茲東征西伐畧無寧歲内外荐費徵求調發皆迫於國計切於軍期率以權便裁之新書從事且救當時之急殊非致理之道今外虞既平罔不率俾天時人事表裏相符宜昭畫一之法大布惟新

之令甄陶化源去末歸本魏晉有度支尚書校計軍國  
之用國朝但以郎官署領辦集有餘時艱之後方立使  
額叅佐既衆簿書轉煩終無弘益又失事體其度支使  
及關內河東山南西道劍南東川西川轉運常平鹽鉄  
等使宜停儀禮之本職在奉常往年置使因循未改有  
乖舊制寔曠司存委太常卿自舉本職其使宜停漢朝  
丞相與公卿以下五日一決事帝親斷可否且國之安  
危不獨注於將相政之理亂固亦在於庶官尚書侍郎

左右丞及九卿參領要重朕所親倚固當朝夕進見以之匡益也頃以邊陲未寧日不暇給又省事之務多有所分簡而無事曠而不接今大舉綱目重頒憲章並宜詳校所掌明徵典故一一條具面陳損益如非時須有奏議亦聽詣閣請對當覽其意擇善而從朕受昊天之成命祇累聖之鴻業齋心滌慮夙夜憂營顧以不敏不明薄於德化致使舊章多廢至理未弘其心媿耻終食三歎雖詔書屢下以申賑恤而朝典未舉猶深鬱悼思

與百辟卿士勵精於理俾國經王道可舉而行各宜承

式以恭爾位

大歷五年三月

釐革匭函進狀詔

勅匭函所設貴達下情近省所投文書頗甚煩碎或論  
列祖曾功業或進獻自己文章無補國經有紊時政極  
言不諱豈假匿名今後如知朝廷得失軍國利害寔負  
冤屈有司不為申明者任投匭進狀所由即時引進不  
得擁滯餘不在投匭之限宜委匭使准此仍留副本

開成

五年  
四月

釐革請留中不出狀詔

近因李延齡告李芳回大逆其狀請留中不出朕親覽  
之際已得其情及令鞠問果辨欺詐比者朝官論入過  
失亦請留中且嫉惡除奸人臣明義知其隱隱足得顯  
陳深務益藏必因嫌恨事不由於直道情乃近於讒邪  
危人者得騁私懷懼謗者何從自辨無裨政理適長寬  
誣昔漢宣帝時章文必有敢告之字乃下前王令典寔



可遵行宜起今後應有朝官及上封事人進章表論人  
罪惡並須證驗明白狀中仍言請付御史臺按問不得  
更云請留中不出如軍國要務機事密切者不在此例  
推勘後如得事實必獎奉公苟涉加誣當令返坐如此  
則人知畏法事免搆虛各示中外令知朕意

會昌元  
年六月

唐大詔令集卷九十九